

CONVENIO DE COLABORACIÓN ENTRE A UNIVERSIDADE DE SANTIAGO DE COMPOSTELA E O SERVIZO GALEGO DE SAÚDE PARA A PROMOCIÓN DA PARTICIPACIÓN DO COMPLEXO HOSPITALARIO UNIVERSITARIO DE VIGO EN PROGRAMAS DE FORMACIÓN E DOCENCIA CLÍNICA DO GRAO DE MEDICINA.

En Santiago de Compostela, 12 de abril de 2016

REUNIDOS

Dunha parte, D. Jesús Vázquez Almuiña, conselleiro de Sanidade e Presidente do Servizo Galego de Saúde, actuando en nome e representación deste organismo autónomo, de acordo co establecido no artigo 34 da Lei 1/1983, do 22 de febreiro, reguladora da Xunta e da súa Presidencia, modificada pola Lei 11/1988, de 20 de outubro, e de conformidade co Decreto 43/2013, do 21 de febreiro (modificado por Decreto 111/2013, do 4 de xullo), polo que se establece a estrutura orgánica do Servizo Galego de Saúde, e de conformidade co establecido na Lei 1/2016, de 18 de xaneiro, de transparencia e bo goberno de Galicia, así como na Lei 30/1992, de 26 de novembro, de réxime xurídico das administracións públicas e do procedemento administrativo común.

E doutra parte D. Juan Manuel Viaño Rey, Reitor da Universidade de Santiago de Compostela segundo nomeamento efectuado polo Decreto 62/2014, de 28 de maio (DOG de data 04.06.2014), actuando en nome e representación da mesma en virtude dos poderes outorgados polo artigo 20 da Lei Orgánica 6/2001, de 21 de decembro de Universidades, e do artigo 82 do Decreto 14/2014, de 30 de xaneiro, polo que se aproban os Estatutos da Universidade de Santiago de Compostela, con [REDACTED] e sede social no Pazo de San Xerome, Praza do Obradoiro s/n, 15782, Santiago de Compostela.

Recoñecéndose ámbalas dúas partes capacidade xurídica suficiente para formalizar e asinar o presente **CONVENIO**,

EXPOÑEN

PRIMEIRO.- Que con data 9 de outubro de 2015, asinouse, entre a Consellería de Cultura, Educación e Ordenación Universitaria, a Consellería de Sanidade-Servizo Galego de Saúde, a Universidade de Santiago de Compostela, a Universidade da Coruña e a Universidade de Vigo, o Convenio para a colaboración na docencia clínica do grao en medicina da Universidade de Santiago de Compostela. Neste Convenio recóllese que a Facultade de Medicina da USC será a única que imparta o Grao en Medicina no Sistema Universitario de Galicia, correspondendo a responsabilidade académica do mesmo aos órganos de goberno e os departamentos da

Facultade de Medicina e Odontoloxía da USC que serán os encargados da planificación e organización docente da titulación, sen prexuízo da colaboración das Universidades da Coruña e de Vigo e do SERGAS na docencia clínica, conforme ao estipulado neste convenio. Para o desenvolvemento da docencia clínica do Grao en Medicina, a USC poderá contar, como persoal propio, con profesionais sanitarios dos hospitais universitarios e centros de saúde de Galicia. Este persoal será contratado pola USC, como profesores asociados de ciencias da saúde (PACS), previo proceso selectivo de acordo co Decreto 266/2002.

SEGUNDO.- A Universidade de Santiago de Compostela é unha entidade sen ánimo de lucro que leva a cabo actividades de investigación, docencia e desenvolvemento científico e tecnolóxico.

Segundo o artigo 4 dos Estatutos da USC, para o mellor desenvolvemento das súas funcións, a Universidade de Santiago de Compostela propiciará o establecemento de relacións con outras universidades, organizacións e institucións.

TERCEIRO.- A Universidade de Santiago de Compostela, tal e como se indicou, ten a responsabilidade da organización e impartición do Grao de Medicina, titulación única do SUG.

No presente curso 2015-2016, implantouse o 6º curso do Grao, con materias totalmente prácticas, dirixido ós alumnos que cursaron a totalidade do Grao, arredor de 350 alumnos.

Para levar a cabo a dita docencia, dado o elevado número de alumnos, preténdese contar coa totalidade dos hospitais universitarios do SERGAS, entre eles co Complexo Hospitalario Universitario de Vigo.

Para a impartición dunha docencia práctica de calidade das materias de 6º curso do Grao de Medicina, un hospital como o CHUVI debe contar cos recursos necesarios que se encarguen das distintas materias.

O Servizo Galego de Saúde considera conveniente colaborar coa USC para incorporar a Estrutura Organizativa de Xestión Integrada de Vigo para a docencia clínica do Grao de Medicina, facilitando a contratación do profesorado para os cursos 2016-2017.

CUARTO.- O Servizo Galego de Saúde é consciente de que a participación activa dos profesionais sanitarios do CHUVI na docencia clínica dos estudantes de medicina supón un estímulo importante para a súa actualización e formación continuada o que redundará nunha maior satisfacción dos profesionais e nunha mellor atención ós cidadáns.

Por iso, o Servizo Galego de Saúde considera moi importante que o CHUVI colabore coa Facultade de Medicina e Odontoloxía da USC participando na docencia clínica do Grao de Medicina.

A través do presente convenio, materialízase a colaboración entre as universidades e as institucións sanitarias nas que se deben impartir ensinanzas universitarias, para os efectos de garantir a docencia práctica de medicina, enfermaría e outras ensinanzas que a así o esixan, de conformidade co previsto no artigo 126 da Lei 8/2008, do 19 de xullo, de Saúde de Galicia

Cómpre ter en conta a concorrência de razóns de interese público e social, así como a especificidade técnica que

require a cobertura das prazas docentes para asegurar a mellor formación para os futuros profesionais sanitarios, polo que resulta innegable o interese do Sistema Público de Saúde de contribuír á formación dos mesmos. A Lei orgánica 14/1986, do 25 de abril, Xeral de Sanidade, no seu artigo 104, estableceu as bases xerais do réxime de concertos entre as universidades e institucións sanitarias, determinando o marco normativo da colaboración entre ambas institucións mediante a subscrición dos correspondentes concertos para garantir os obxectivos docentes, asistenciais e de investigación.

Este espírito de necesaria colaboración foi recollido tamén na Lei 8/2008, do 10 de xullo, de Saúde de Galicia, que dedica o capítulo I do Título IX á regulación da docencia e formación, incidindo na necesidade de coordinación e colaboración entre as universidades e as institucións sanitarias en materia de educación e sanidade.

Tendo en conta os compromisos adquiridos nos instrumentos aos que nos temos referido anteriormente, unido ao feito de que se trata de formación regrada impartida exclusivamente en centros docentes do Sistema Universitario de Galicia, o réxime destas axudas encádrase no procedemento de concesión directa regulado nos artigos 19.4c) e 26 da Lei 9/2007, de 13 de xuño, de subvencións de Galicia.

Conforme ao anterior, o Servizo Galego de Saúde e a USC **ACORDAN a sinatura do presente Convenio**, que ten por obxecto establecer a colaboración entre ambas institucións de cara a promover e facilitar a participación do Complexo Hospitalario Universitario de Vigo na docencia clínica da titulación de Medicina.

O desenvolvemento deste Convenio rexeráse polas seguintes

CLÁUSULAS:

PRIMEIRA: O obxecto do presente convenio é facilitar a participación dos profesionais sanitarios do Complexo Hospitalario Universitario de Vigo na impartición da docencia clínica en Medicina, para o cal a Universidade de Santiago de Compostela comprométese a ofertar a entre 60-80 alumnos/as a realización das materias prácticas de docencia clínica do 6º curso do grao en medicina no citado complexo hospitalario, durante a vixencia do presente convenio.

SEGUNDA.- De conformidade coa Lei 1/2016, do 18 de xaneiro, de transparencia e bo goberno de Galicia, coa Lei 19/2013, do 9 de decembro, de transparencia, acceso á información pública e bo goberno, e co previsto no Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia para o ano 2006, a sinatura do presente convenio suporá o consentimento expreso á Administración Autonómica, para incluír e facer públicos os datos referidos ao convenio nos Rexistros de Convenios da Xunta de Galicia, polo que a Consellería de Sanidade dará publicidade deste convenio na súa páxina web oficial e no rexistro público de axudas, subvencións e convenios e incluírá no rexistro público de sancións aquelas que se puideran impoñer como consecuencia do seu desenvolvemento.

TERCEIRA: De conformidade co obxecto do presente convenio, e co fin de promover a participación dos profesionais sanitarios do Complexo Hospitalario Universitario de Vigo na impartición da docencia clínica en Medicina, a Universidade de Santiago de Compostela comprométese a posibilitar o acceso daqueles profesionais a través da convocatoria de NOVE (9) prazas de PACs do CHUVI para o curso académico 2016-2017 e 2017-2018 que corresponderán ás seguintes áreas de coñecemento:

- Catro (4) prazas da área de coñecemento de Medicina (cardioloxía, dixestivo, neuroloxía e pneumoloxía).
- Unha (1) praza da área de Psiquiatría.
- Tres (3) prazas da área de Cirurxía (anestesioloxía, cirurxía vascular e neurocirurxía).
- Unha (1) praza da área de Pediatría.

A Universidade levará a cabo as accións necesarias para promover que poidan ser convocadas con cargo ao seu orzamento, previa existencia de recursos e autorización da Comunidade Autónoma, a partir do curso académico 2018-2019.

CUARTA: O Servizo Galego de Saúde comprométese a promover dita participación a través dunha axuda cun importe máximo de 59.629,68 euros, coa seguinte distribución por anualidades:

- Exercicio 2016: 9.938,28 euros
- Exercicio 2017: 29.814,84 euros.
- Exercicio 2018: 19.876,56 euros

Este importe será imputado na aplicación 1571/412A/444.1 do orzamento de gastos do Servizo Galego de Saúde e actualizarase de conformidade co disposto na lei de orzamentos.

O abono destas cantidades levarase a cabo do seguinte xeito: Os importes previstos nas correspondentes anualidades faranse efectivas no momento de presentar a documentación xustificación do gasto producido.

Estas cantidades faranse efectivas na seguinte conta: *Titular da conta: Universidade Santiago de Compostela*
Entidade bancaria: [REDACTED]

[REDACTED]. *IBAN (Código de clasificación):* [REDACTED]

QUINTA: En canto aos gastos subvencionables atenderase ao disposto no artigo 29 da Lei 9/2007, de subvencións de Galicia. Consideraranse gastos subvencionables aqueles que de xeito indubidable respondan ao obxecto do presente convenio no período de vixencia do mesmo.

Para os efectos do previsto no artigo 45 e seguintes do Decreto 11/2009, a USC presentará antes do 1 de decembro de cada anualidade os documentos xustificativos que acrediten expresamente o destino e importe dos gastos efectivamente realizados.

Nos termos recollidos nos artigos 28 a 30 da Lei 9/2007, do 13 de xuño, de subvencións de Galicia, así como nos artigos 41 e 42 do Decreto 11/2009, do 8 de xaneiro, polo que se aproba o Regulamento da Lei 9/2007 do 13 de xuño de subvencións de Galicia a xustificación do cumprimento consistirá na certificación da intervención da USC ou do órgano que teña atribuídas as facultades de control da toma de razón en contabilidade e do cumprimento da finalidade para a que ten sido concedida.

Cando as actividades teñan sido financiadas, ademais de coa subvención, con fondos propios ou outras subvencións ou recursos, acreditarase na xustificación o importe, procedencia e aplicación de tales fondos ás actividades.

A subvención obxecto deste convenio é compatible con outras subvencións, axudas, ingresos ou recursos para a mesma finalidade, procedentes de calquera Administración ou entes públicos ou privados, nacionais, da Unión Europea ou de organismos internacionais, sen prexuízo do disposto no artigo 17.3 da Lei de subvencións de Galicia.

Así mesmo, a USC comprométese a facilitar toda a información que lle sexa requirida pola Intervención Xeral da Comunidade Autónoma, polo Tribunal de Contas e polo Consello de Contas, no exercicio das súas funcións de fiscalización e control do destino das subvencións

SEXTA: O período de vixencia do convenio comezará ao día seguinte da súa sinatura e finalizará ao rematar o curso académico 2017-2018, todo elo sen prexuízo de que ámbalas dúas partes, por acordo expreso, poidan formalizar unha prórroga para sucesivos cursos académicos, condicionada á existencia das correspondentes dotacións orzamentarias.

Calquera das partes poderá denunciar o convenio cunha antelación mínima de tres meses á data no que vaia darse por finalizado.

O incumprimento das cláusulas deste convenio será causa bastante para a súa denuncia.

SÉTIMA: Para o seguimento e control do cumprimento deste convenio, e para a solución das dúbidas que a súa interpretación poida motivar, créase unha comisión integrada por dous representantes de cada unha das institucións asinantes. Serán funcións da devandita Comisión a coordinación e seguimento das obrigas das partes no presente convenio e a resolución dos problemas de interpretación e cumprimento que poidan proporse con respecto ao convenio. A Comisión reunirase polo menos unha vez por curso académico, sen prexuízo da posible convocatoria de reunións extraordinarias sempre que sexan necesarias para o desenvolvemento das actuacións reflectidas no convenio.

OITAVA.- Sen prexuízo das causas de reintegro previstas no Título II da Lei 9/2007, de subvencións de Galicia, son causas de resolución do presente convenio:

- O incumprimento total ou parcial de calquera das súas cláusulas ou das obrigas recollidas neste convenio dará lugar ao reintegro total ou parcial das axudas recibidas e o xuro de demora correspondente de acordo co establecido no Art. 33 da Lei 9/2007, do 13 de xuño de subvencións de Galicia, e nos artigos 74 e seguintes do Decreto 11/2009, polo que se aproba o seu regulamento.
- A aplicación dos fondos outorgados a fins distintos dos que motivaron a súa concesión.

- O mutuo acordo das partes asinantes.
- A introdución de modificacións nas directrices dos programas a desenvolver, sen contar coa previa autorización escrita da Administración sanitaria.
- A denuncia de calquera das partes asinantes, sempre que o notifique ás outras con tres meses de antelación a data de finalización da vixencia do convenio.

Toda alteración das condicións tidas en conta para a concesión destas axudas, e en todo caso a obtención de subvencións ou axudas outorgadas por outras administracións, entes públicos ou privados, poderá dar lugar, se con isto se alterasen os obxectivos deste convenio, á modificación dos importes das axudas.

NOVENA: O presente convenio de colaboración ten natureza administrativa. As dúbidas que se presenten na súa interpretación e execución serán resoltas pola Comisión de seguimento. As partes quedan suxeitas á xurisdición contencioso-administrativa para a resolución de calquera conflito que puidera xurdir na aplicación do mesmo.

En todo o non disposto neste convenio será de aplicación a Lei 9/2007, do 13 de xuño de subvencións de Galicia, o decreto 11/2009 de 8 de xaneiro, polo que se aproba o Regulamento da lei 9/2007 do 13 de xuño e en canto non se opoña ao establecido na dita Lei, a Lei 38/2003, de 17 de novembro, xeral de subvencións .

En en proba de conformidade, asinan o presente convenio en cadruplicado exemplar, no lugar e data indicados no encabezado.

O PRESIDENTE DO SERVIZO GALEGO DE SAÚDE,

O REITOR DA USC

Asdo.: Jesús Vázquez Almuiña

Asdo.: Juan M. Viaño Rey